

Innuttaasut atsiornernik katersinermikkut siunnersuutini Inatsisartuni suliarineqartussanik saqqummiussisarnissaat siunertaralugu Naalakkersuisut aaqqissuussinermik pilersitseqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Pipaluk Lyngø, Inuit Ataqatigiit)

Akissuteqaat

(Isumaginninnermut, Suliffeqarnermut, Ilaqtariinnut Nunamullu Namminermt Naalakkersuisoq)

Siullermeerinnineq

Innuttaasut tamat oqartussaanerannut peqataanissaat pillugu apeqquummik pingaaruteqartumik matumangga oqallinnissamut suliniuteqarneranut Inatsisartunut ilaasortaq, Pipaluk Lyngø, qujassuteqarfigaarput.

Naalakkersuisut siunnersuummut isumaqataapput Nunatsinnilu inatsisiliornermut innuttaasut toqqaannartumik sunniuteqarnissaannik nukittorsaasusaaq pillugu siunertaqarneq tamakkiisumik taperserlugu.

Inuiaqatigiinni tamat oqartussaanerat malillugu ingerlatsivugut, innuttaasullu tamarmik akisussaaqataasariaqarlutik.

Innuttaasut siunnersuuteqarnissaannut aaqqissuussineq inuit peqataatinneqarnerannik nukittorsaansamut tigussaasumik ullumikkumullu naleqquttumik sakkussaasaaq aamma innuttaasut nipaata Inatsisartunut aaqqissuulluakkamik pisussaaffiliisumillu anngunnissaat qulakkeerneqassalluni.

Naalakkersuisut maluginiarpaat, siunnersuut ilusiliinermik tigussaasumik aalajangiussinngitsoq, kisianni aaqqissuussinermik ilusiliinissaq piviusunngortitsinissarlu pillugit Naalakkersuisut peqquneqassasut. Naalakkersuisut tamanna naapertuuttutut isigaat, aaqqissuussinermi pillugu ilusiliinermi suliamut inatsisitigullu apeqqutit arlallit qulaajarnissaannut pisariaqartitsisoqassamat, makkuusunik:

- Innuttaasut siunnersuutaannik Inatsisartunut saqqummiunneqarsinnaanerannut atsiortitsinerit amerlassusaasa ikinnerpaaffiat pillugu piumasaqaat
- Atsiortitsinerit katersornissaannut piffissaliussat iluseqarnissamullu piumasaqaateqarneq
- Siunnersuutip imarisassai ilusissaalu pillugit piumasaqaateqarneq
- Innuttaasut siunnersuutaannik suliaqarnissamut Inatsisartuni, tassunga ilanngullugu ataatsimiititaliami suliarineqarnissaannik, suleriaasissaq
- Qarasaasiakkut aaqqiissummik nunatsinni pissutsinut naleqqussakkamik pilersitsineq ingerlatsinerlu

Naalakkersuisut siunnersuuteqartup immikkut pingaartillugu tikkuagaa, qinigaaffiup ataatsip ingerlanerani Nunatta isorartunerujussuata innuttaasut tamaasa anguneqarnissaannik ajornakusoortitsinera nassuerutigaat. Qarasaasiakkut innuttaasunut siunnersuuteqartarfiup unammilligassaq taannarpiaq naammassissavaa aamma innuttaasut nuna tamakkerlugu, sumi najugaqarneq apeqqutaatinnagu, innuttaasut tamat oqartussaaqataanerannut peqataanissaannut periarfissaqarnissaq qulakkiissallugu.

Aningaasaqarnikkut kingunerisassai pillugit Naalakkersuisut naliliipput, tigussaasumik missiliuussinermik aalajangiisoqannginnerani, isumalluutininik pisariaqartitsineq tamakkiisoq erseqqinnerusumik misissortariaqartoq, allaffissornikkut isumalluutininik pisariaqartitsineq inaarutaasumik qulaajarneqanngimmat, piviusorsioqumillu naliliinissamut sukumiinerusumik piareersarluni suliaqartoqartariaqarmat. Naalakkersuisut aningaasartuutit erseqqinnerusumik paasiniarnissaat piareersarlutik suliariniarpaat.

Taamatut oqaaseqarlutik allannguutissatut siunnersuummik tulliuttumik Naalakkersuisut innersuussuteqarput:

“Suliap Inatsisartuni inaarutaasumik suliarinissaanut saqqummiunnissaa sioqqullugu innuttaasunit siunnersuutininik aaqqiissutissap pilersinnissaanut periarfissanik misissuinissamik Naalakkersuisut peqquneqarnissaat pillugu Inatsisartut aalajangiussassaannut siunnersuut.”